

REGIONAL NEWS

HEADLINES:-

1. Dengue hri leng avangin tun thlengin Mizoramah mi 8 an thi tawh.
2. Champhai District khaw hrang hrang ah sawhthing a tam avangin sawhthing chingtute'n harsatna an tawk tan.
3. Prime Minister Narendra Modi-a'n thlai chi thar siam chhuah 109 a tlangzarh.
4. July ni 24 atanga tan, Paris Olympics chu zanin hian khar a ni dawn ta.

<><><>

DENGUE

Dengue hri leng avangin tun thlengin Mizoramah mi 8 an thi tawh. Health and Family Welfare hnuai a State Vector Borne Diseases Control Programme (SVDBCP) hotute hnen atanga thu dawn danin kumin July thla khan Aizawl Tuikual veng ami chu Dengue vangin a thi a. Kum 2022 khan mi 5 an thi a, nikum khan 2 an thi bawk. Kuminah hian Dengue hri kai ni a inringhlel mi 3,186 sample endik zinga 228 chuan he natna hi an vei tih hmuhchhuah a ni a. An zinga mi 126 te hi Aizawl district ami an ni a, Lunglei district-ah Dengue vei hmuhchhuah 94 an awm bawk a, district dangah chuan awm ve bawk mah se, Aizawl leh Lunglei district hi Dengue hri kai hmuhchhuah tam berna a ni. Kum 2013 kha Mizorama Dengue natna kai hmuhchhuah hmasak ber kum a ni a. Kum 2022 kha hri kai hmuhchhuah tam kum leh nunna chan pawh an tam ber kum a ni a. Nikumah pawh khan Dengue hri vei hi an tam tho a ni.

Hetih lai hian thosi seh avanga natna kai darh chi tho Chikungunya avangin Mizoramah thi an la awm lova, kumin chungin he hri kai inringhlel mi 94 sample lak zingah hri kai hmuhchhuah an awm lo bawk. Hri kai rinhlelhte hi Lunglei district ami vek an ni. Kum 2018 khan Chikungunya hri kai Mizoramah a hmasa ber atan hmuhchhuah a ni a, mi 10-in he hri hi an kai a. Kum 2020 khan Chikungunya hri kai mi 67 hmuhchhuah a ni a, kum 2022 khan mi 53 hmuhchhuah leh a ni. Lunglei district-ah he natna hri kai hmuhchhuah a tam ber a ni.

SVDBCP hotuten sawi dan in nikum khan malaria hri vei hmuhchhuah a tam hle a, mi 18,005 in sikserh natna hi vei-in an zinga 13-in an thihpui. Kum 2022 nena khaikinik nikumah sikserh natna vei za zela 76 chuangin a pung a ni.

<><><>

MOS

Mizorama cham mek Union Rural Development minister Pu Kamlesh Paswan an nimin khan Aibawk BDO pisa a tlawh.

Pu Kamlesh hi BDO Conference Hall, Aibawkah RD official te, khawtlang hruaitute, RD Dept. hnuai ruahmanna hrang hrang hmang tangkaitute'n lo hmuakin, inkawmhona hun hlimawm tak an hmang a. Inkawmhona hun hi Rural Development Secretary Pu Zarzosanga'n

kaihruaiin, Aibawk BDO Pi Esther Leihang in Aibawk RD block hmalakna hrang hrang leh hmachhawp mek te entirin report a pe a ni. Union Minister chuan Prime Minister Narendra Modi an Hmarchhak state te kawng hrang hranga tihmasawn a tum hletih sawiin, kawng hrang hrangin hmasawna rahbi pawh tuk mek a ni, a ti a. Chuvangin ani pawhin a Ministry chan hnuaiia hmasawna hnathawh mek te dinhmun leh eng harsatna nge an tawh tih te hre turin a hmuna rawn kal a nih thu a sawi a. Minister chuan Aibawk RD Block hnuaiia heng Scheme hrang hrang :Pradhan Mantri Awaas Yojana-Gramin (PMAY-G) Pradhan Mantri Gram Sadak Yojana (PMGSY), MGNREGA, Deen Dhayal Upadhaya Grameen Kaushalaya Yojana(DDU-GKY), MzSRLM leh ruahmanna dangte viltu leh buaipuitu official te chu chipchiar takin an hmalakna te zawtin, hmang tangkaitute hnenah pawh harsatna an neih te zawtin an inkawmho a ni.

Hemi hnu hian Raj Bhavan-ah Pu Kamlesh Paswan chuan larsap Dr Hari Babu Kambhampati a kawm a. Larsap hnenah hian Mizoram a rawn kal chhan te, Mizoramah a cham chungah a hun hman dan tur te hrilh a. Larsap leh Minister te hian thingtlangmite'n Rural Development Department hnuaiia hnathawh hrang hrang leh hmalakna an tangkaipui thute sawiin an ngaih pawimawh thil dangte pawh an sawi dun a ni.

<><><>

CIVIC BY-POLL

Aizawl Municipal Corporation (AMC) bial 6-na ruak hnawhkhat tura candidate 3-te tana inhnudawhna hun hnukung chu naktuk thleng hawn a ni.

AMC bial 6-na a inthlanna hi kil thum atanga inchuh tur an ni a. BJP candidate Pu Chawngmingthanga, ZPM candidate Pu H. Lalremtuanga leh MNF leh Congress-in an thlawp independent candidate Pi Lalrinfeli te hi tun thla ni 22 a AMC bial 6-na inthlann (by-election)-ah an inkhing dawn a. He lai biala inthlan that a tulna chhan hi kum 2020 AMC inthlanna a thlan tlin MNF candidate Pu John Zosangliana Ralte a thih vang a ni a. MNF leh Congress chuan party candidate siam lovin Pu John Zosangliana Ralte thih san, a nupui Pi Lalrinfeli independent hi an thlawp a ni. AMC bial 6-na by-election a vote tlate hi August ni 26 khian chhiar a ni dawn a ni.

<><><>

GINGER

Champhai District khaw hrang hrang a sawhthing a tam avangin sawhthing chingtute'n harsatna an tawk tan.

Champhai District a khaw hrang hrang VCP leh YMA hruaitute hnen atanga thu dawn danin, kumin hian kum dang zawng aiin kuthnathawktuten sawhthing an ching uar a. Khaw thenkhatah chuan a chi man a to deuh avangin dukhawp ching thei lovin a chi chhuahna tur tawk an ching a. In awm zawng zahve ai a tam sawhthing ching awmna khua te pawh a awm nual a. Champhai khawpui atanga thingtlang lama sawhthing chingtu pawh an awm nual baw. Champhai District Horticulture Officer Pu Zonunsanga hnen atanga thu dawn danin, sawhthing chingtute'n an sawhthing a tam tan chho mek tih thu an dawn nual tawh avangin sawhthing tam venna beihpui thlak tum a ni.

Naktip, Thawhlehi khian Aizawl-a Horticulture Directorate-ah Mizoram pum huap District Horticulture Officer, Addl. District Horticulture Officer, Block Horticulture leh Technical Staff zawng zawng sawhthing tam chungchang zirho tura kohkhawm an ni a. Zirtawpni atangin sawhthing tam beihpui thlak turin fehchhuah runpui an huaihawt dawn a ni.

Tun dinhmunah Sawhthing tam hi hmuh tan ni mahse, a la tam nasa lutuk rih lo niin an sawi a, Loneitu thenkhat chuan Horticulture Department a mithiam te thurawn angin damdawi chi hrang hrang hmangin an sawhthing te an kap mek a ni.

<><><>

ASF UPDATE

Vawiin khan African Swine Fever (ASF) vawk pulhri leng avangin district pali-ah vawk 23 a thi.

Animal Husbandry and Veterinary department hotute hnen atanga thu dawn danin Aizawl, Lunglei, Serchhip leh Hnahthial district ah te, vawk thi report a awm a. Heti hian kumin February ni 9-a Champhai district Leithum khua a ASF avanga vawk thi an hmuhchhuah leh atang khan vawk pulhri avangin vawk 9,322 an thi tawh a, Tun dinhmunah khua/veng 203-ah vawk pulhri hi a leng mek a ni.

ASF vawk pulhri a darh zel lohna atan vawiin khan vawk 68 suat a ni a. Kumin chhunga vawk suat tawh zat hi 17,389 a tling tawh a ni.

<><><>

RATION CARD CONTROVERSY

MNF Thalai Hqrs hruaitute chuan an Vice President Pu Lalnunmawia Pautu hovin tunhnaia Mizoram sorkarin Phuldungsei khuaa Mizoram ration card nei ngeth mi 85 a paihsakte zirchiangin khawtlang hruaitute an inkawm.

MNYF Vice President chuan ZPM sorkarin Mizorama Aadhaar Card nena Ration Card thlunzawm vek tawh Phuldungsei khaw mi 85 Ration Card an paihsak chu demawm a tih thu leh Mizo mipuite leh Phuldungsei kuate mai bakah Mizo hnam pawikhawihna a ni a ti a. Mizoram sorkar lo awm tawh zawng zawngin ramri chungchang fimkhur tak leh thiam taka an ngaihtuah thin lai a hetiang thil a thleng hi MNYF chuan an la thutak in, chhui chiangin, a tul ang zelin hma an la dawn tih a sawi a ni. MNYF in an sawi danin Phuldungsei khuaa mi 85 te hi Mizorama Aadhaar Card thlunzawm Ration Card nei vek an ni a, kumin April leh May thla khan an ration card te hi an hriat miah loha paihsak an ni an ti a, Tripura sorkar hian an state a Aadhaar nena an Ration Card thlunzawm hi an duh leh tum dan a ni a, Mizorama thlunzawm a nih avangin an ti thei lova. Mizoram sorkarin a paih veleh Tripura sorkar chuan a lo thlunzawm vat a, a lo paihsaktu Mizoram sorkar chuan a thlunzawm thar leh mai thei tawh lo ni a an hriat thu an sawi bawk.

Hemi chungchangah hian Bialtu MLA leh MNYF President Pu Robert Romawia Royte chuan CM Pu Lalduhoma hmaichhana sawipui nghalin lehkhaw pawh pek a nih thu an sawi a, Central sorkara Ration Cards Management System (RCMS) mithiam te pawh a sawipui tih an sawi a ni. Hetih lai hian nimin khan ZPM chuan thuchhuah siamin, Phuldungsei khuaa mi thenkhat ration card paihsak ni a thuthang chungchangah India sawrkarin End to End Computerisation of Targeted

Public Distribution System (TPDS) kalpuiin, RCMS chu Aadhaar Card hmanga finfiah ngai a nih avângin adhaar pakhat hi ration card pakhat chauh chhinchhiah theih a ni a, hei vâng hian Phuldungsei-a mi thenkhat ration card chu Tripura lamah lo register tawh a nih avângin RCMS khawl hmanga chhinchhiah theih an ni lo tih an sawi a ni.

<><><>

PM RELEASES NEW CROP VARIETIES

Prime Minister Narendra Modi-a'n vawiin khan thlai chi thar siam chhuah 109, New Delhi-a India Agriculture Research Institute-ah a tlangzarh a, heng zingah hian buhtun, fu, la, leh be lam chi bakah thei, thlai hring, pangpang leh ramhmul damdawi chi hrang hrang a tel a ni.

Tlangzarh puala scientist leh loneitute nen inkawmhona neihah Pu Modi-a chuan buhtun pawimawh zia leh mipuiin thil hrisel zawk ei an duh telh telh thute a sawi a, thlai chi thar siam chhuaktu scientist-te chu fakawm a tih thu a sawi bawk.

<><><>

PARIS OLYMPICS TO END

Paris Olympics 2024 chu zanin hian khar a ni dawn ta a, kharna inkhawm hi India sanaa zanin zanlai dar 12:30-ah tan a ni ang. Records tia vuah, Kharna inkhawmah hian thil dang bakah infiammite hlawhtlinna chi hrang hrang tarlan a ni ang a, Olympic mei tih mih anih hnuah kum 2028 Olympics thlengtutur Los Angeles Organising Committee kutah hlan a ni ang.

Kharna inkhawma ram hrang hrang infiammite parade neih turah India aiawhin PR Sreejesh-a leh Manu Bhaker-i ten hnam puanzar an keng ang a, Sreejesh-a hi mipa hockey team-a goal keeper niin India bang, Wall of India tia hriat a ni a, India team bronze medal a lakpui hnu lawkah hockey khelh a chawlhsan tawh tur thu a puang a ni. Manu Bhaker-i hi India-in zalenna a chan hnua Olympic edition pakhata medal 2 la thei awmchhun a ni a,

<><><>